

05. oktober

UKA 2017/91

Inuit piginneqatigiiffinni aningaasaliissuteqarnermikkut pappialallu nalillit ilaasigut iluanaarutaasa annaasaqaataasalu akileraaruserinikkut aaqqiivigineqartarnerat pillugu Inatsisartut inatsisissaattut siunnersuutaat

(Aningaasaqarnermut Akileraartarnermullu Naalakkersuisoq)

Naalakkersuisut inatsisissatut siunnersuutaannut Siumumiit imaattumik oqaaseqaateqassaagut:

Naalakkersuisut Inatsisartut inatsisissaattut siunnersuutaat pappiaqqanik nalilinnik pigisaqartut iluanaarutaat annaasaqarneralluunniit pillugit imaqarpoq. Aningaasanik iluanaaruteqarnermi agguagarsisitsisarnerup iluani akitsuusersuinissaq siunertaasoq Siumumiit paasivarput. Aningaasaliissutitigut isertitat allat, soorlu iluanaarutit, erniatigut isertitat akissarsiatigullu isertitat assigalugit kalaallit nunaanni akileraarusernissaat siunnersuutikkut anguniarneqarpoq. Siunnersuut aqqutigalugu 2019-mi januarip aallaqqaataani pappialanik nalilinnik iluanaaruteqartut akileraaruteqartussaataalissapput. Peqatigitillugulu annaasaqaataasut ilanngaataasinnaassasut siunnersuummi maluginiarparput.

Naalakkersuisut siunnersuutigaat pappilissanit nalilinnit pigisaqarnermi iluanaarut inuttut sulinermi akileraarutit annertussuseqassasoq. Taamatutaaq piginneqatigiiffiit nunatta avataaniittut nalunaarsugaanngitsullu inuit sulinerminni akileraarutaattulli akileraarusernissaat. Tamanna Siumumiit taperseratsigu oqaatigissavara. Ernummataasorli qulaajarneqartariaqartoq siumumiit imaattoq qaqqissavarput. Tassa aningaasaliisartut avataaneersut kalluarneqarsinnaappat? Nunatsinni aallarnisaaniarluni piginneqatigiiffinnik pilersitsisarneq eqqorneqassava?

Tamakku apeqqudit annertuumik ataatsimiitsitaliarmi suliarinnittussat misissortariaqarpaat. Tassami Siumumiit pingaartittuagaraarput politikikkut suliffeqarfiit imminut napatittut aammalu inuit aningaasaatitik atorlugit aningaasaliiumasut inuiaqatigiinni aningaasaqarnikkut iluaqutaasinnaasunik aallarniiumallutik tapersersortuarnissaat.

Taamaattumik Siumumiit ineriartornerup ilorraap tungaanut ingerlasup suli sukkanerusumik

ingerlalnissaa soqutigisaraarput. Taamaattumillu annertuumik matuma Inatsisartut inatsisissaattut siunnersuutip ilusaata tunngaviusumik misissoqqissaarneqarnissaa Siumumiit inassutigaarput, taamaalilluni aningaasaliisartut aningaasaliisarnissaat aningaasaleerusussuseqartuarnissaallu qulakkeersimaneqartuassamat. Taamatutaaq nunatta iluanit aammalu avataanit nunatta aningaasaliiffissatut isigineqarnerata innarlerneqannginnissaa illuatungaanili kajungernartuunissaa Siumumiit sulissutigineqartariaqartoq isumaqarpugut. Upperaarpummi aningaasat nunatsinni kaaviiartut amerlanerulerpata, aningaasaliinerit kiungerinik suliffissat amerlippata aammalumi innuttaasut nunatsinniittut aningaasaatimik sulitissinnaanissaannut qaammaasaqarnerulerpata nunatsinni inooriaatsip pitsaasup suli pitsaanerusunngortinnissaanut akissaqartinnerulissagipput.

Taamatut oqaaseqarluta Naalakkersuisut Inatsisartut inatsisissaattut siunnersuut aappassaaneerneqartinnani Inatsisartut aningaasaqarnermut akileraartarnermullu ataatsimiitsitaliaanni sukumiisumik suliarineqarnissaa Siumumiit inassutigaarput.

Ineqi Kielsen

Siumut